



QUÆSTIO MEDICA,

CARDINALITIIS DISPUTATIONIBUS,
manè discutienda, in Scholis Medicorum, die Jovis
vigefimâ Martii.

M. ANTONIO LE MOINE, Doctore
Medico, Præsidente.

An Propter Canis Exortum, difficiles æstate Purgationes?

I.

OMNIUM fere morborum antecedentes causæ vulgo statuuntur, plethora, & cacochimia: Illi venæ sectio, huic debetur purgatio: quæ majora remedia nuncupantur. Ita licet in genere sit quælibet humorum qualitate peccantium, sive vomitu, sive per urinas, & sudores evacuatio; usus tamen obtinuit, ut eam quæ per alvum sit propriè designaret. Quæ quidem evacuatio licet solita sit, ut singulis etiam diebus natura debeat ipsius esse memor, non ideo tamen, statim atque sunt hujusmodi humores qualitate peccantes, promovenda. Quamquam enim venæ sectio sit sanguinis, optimi nonnumquam & laudabilis evacuatio; tutius tamen adhiberi potest, quam purgatio, quæ nec in sanis, nec in ægrotantibus, nisi magnis adhibitis cautionibus, præscribi debet; quantum enim istis est necessaria, tantum in illis est aliquando formidanda, in quibus tantum abest ut morbos præcaveat, quin imo nonnumquam excitat, & mortem etiam aliquando procurat. Hinc male sibi consulunt, qui purgantibus assuescunt, cujus quidem consuetudinis ratione, nullatenus est præscribenda, sed illa victus genere est corrigenda. Idoneum in morbis purgandi tempus à dierum numero definire, indignum prorsus est medico rationali. Hæc enim, in febribus potissimum, *evangelia* ab humoris morbum efficientis coctione tota dependet. Nunquam igitur de purgatione cogites, nisi humor quem purgare intendis coctus sit, & ad eliminandum præparatus; quod magis observandum, quo febres vehementiores sunt, ac intensiores. Hinc in earum principiis abstinendum à purgantibus: quæ tamen præscribit Hippocrates, si turgat, & orgasmo concitetur hu-

mor: sed tunc longè securior venæ sectio, quæ efferos, & tumultuosè concitatos humores citius compescit; cum ab illis turbas cientibus magis adhuc efferantur, ita ut sit potius periculum decubitûs in aliquam partem, quam spes exclusionis è corpore. Nec ut purgandi occasionem Hippocratis patrocínio tibi sapius aperias, humores sapius turgere fingas. Si namque rarè turgere in mari Carpathio, ubi insula Cos, observavit Hippocrates; longè rarius in his. ce regionibus, quæ magis ad Boream vergunt, suntque multo frigidiores, turgere necesse est. Coctâ igitur materiâ, opportuna maximè purgatio, turgente periculi plena; nec coctâ, nec turgente, sed urgente, summè non nunquam necessaria; atque ad id audendum tibi suppeditat exemplum Hippocrates in Pythonis filio; suppeditat & natura, cujus imitator esse debes in spontaneis evacuationibus, quæ feliciter succedunt, ut in Metone & aliis. Invitat etiam illa, si deorsum humor feratur; si fluxilis sit, non tenax, crassus, & viscidus; si viâ per quas ducendus, patentes sint & liberæ, nullâque inflammatione affectæ. Si venter strepitus edat, & urinæ sint crassiores. Neque inde putes, contra divini senis oracula, crudorum educationem fieri; evacuationes ejusmodi, quæ sunt existente materiâ crudâ, non sunt crudæ materiæ, sed illius quæ veluti antecedens, in focum transmittenda, putredini & febri pabulum est suppeditatura. Crudam autem, qui suis minorativis educere conantur, viram potius minorant, ut ita dicam, quam humorem morbificum.

I I.

MEDICAMENTA quorum ope purgatio fit, ab effectu purgantia nuncupantur: eorum multa sunt genera, sed quæ magis ad proximam pertinent, ab humore quem educunt, & ab operandi modo repetuntur: illius ratione alia cholagoga, alia phlegmagoga &c. sed male dicuntur; omnia namque omnes purgant humores, sed non omnes æquabiliter. Ab operandi modo, dividuntur in blanda, mediocria, & vehementia; quæ differentia, potius habitâ ratione ægrotantium statui debet: in quibusdam enim leviora, vehementiorum vim imitantur; neque ideo blanda sunt, quod certum ipsis spatium datum sit, & primæ regionis limitibus operatio circumscripta; valentioribus verò per totam microcosmi machinam ambulandi libertas concessa sit: famosa namque corporis humani, tres in regiones divisio, à sanguinis circuitu convellitur. Enim vero cum chylus à ventriculo deferatur ad cor, subtilissimæ quoque ex purgantibus atomi simul ad cor penetrant, & ad totum fere corpus per vasa sese diffundunt; in quibus non sympathiâ, vel virtute magneticâ, humores attrahendo; nec antipathiâ eosdem expellendo; sed sese in cognatos, & affines succos insinuando, eos movent, agitant, & spiculis salinis sese altius infigentibus, ad fermentationem excitant, & solvunt; Unde fit ut qui prius sanguini permixti, nullam naturæ molestiam creabant, jam fusi, liquatique, & quasi turgescerent, naturam ad expellendum irritent. A quibus dum se expedire tentat, eos in totum corpus, arteriarum pulsû cogit: sed ab istis tantum

partibus excipiuntur, quibus figurâ & dispositione conveniunt; atque ita glandulæ hepaticæ biliosos humores hauriunt facile, & per porum biliarium, in intestina transmittunt; serosos autem, & pituitosos excipiunt pancreas, & glandulæ plexuum intestinalium; quos deinde, illud scilicet, per ductum virsungianum; istæ, per suas papillas, quarum poruli sunt à calore patientiores redditi, in intestina deponunt. Concurrit etiam tunica musculosa media, quæ in subsidium intimæ veniens, crebris spasmis, & repetitis fibrarum corrugationibus efficit, ut serum ex istis glandularum papillis copiosius educatur. Nec semper ad purgationem necesse est ut hauriantur pharmaca: quibusdam sufficit purgantium odoratus, aspectus, aliis; quibusdam cum purgatis accubitus. Fuere etiam aliqui ex insomnio; commoda sane purgandi ratio: jucundior tamen est, quam quædam mulieres expertæ, vi purgatrice per venerem cum semine transfusâ. Sed cum hæc rara sint; casu tantum deprehendantur, & ad ejusmodi purgationes dispositio sit solum à naturâ; studuit ars reddendæ purgationi faciliori: hinc nonnulli partium liquidi purgantis crassarum præcipitatione, & secretionem, poriones claras, & limpidas exhibent: sed hæc præterquam non ita sunt efficaces, ipsi ventriculo qui solet ad catharticum, tanquam ad *semi-venenum*, ut non ineptè medici quidam appellant; exhorrescere, non parant. Alii ad ventrem, & umbilicum admovent purgantia: sed eorum effluvia musculis, & membrannis inserta, lethale nonnunquam alvi profluvium excitant. Facilior adhuc purgandi modus à recentioribus inventus, intruso per venam apertam cathartico: sed suo quoque, & gravi periculo non caret ille, præter venæ sectionem, quam non omnes admittunt. Longe profecto feliciores regni Malabarici sacerdotes, qui pharmacum habere dicuntur, quod odore solo sine torminibus, & nausæa purgat; totiesque alvum movet, quoties fuerit ad nares appositum. At licet longe magis temperato cœlo gaudeamus, nec tantus, nec tam diuturnus sit apud nos æstus: æstate tamen molestæ prorsus, & difficiles solent esse purgationes. In nostris etiam purgantibus, quàm dissimilis agendi ratio; nullum est vel inter blandiora, à quo non possit hypercatharsis excitari. Nullum est vel inter vehementiora, à quo vix aliqua fiat interdum excretio. Unum & idem eodem præscriptum homini, diverso tempore, nunc ad voluntatem & prosperè, nunc infeliciter, & malis ipsius, rebus succedit. Adeo peritum, & expertum in faciendâ medicinâ medicum requirit purgatio: tum ut conveniens eligatur pharmacum, tum ut convenienti quantitate, & dosi, convenientique tempore præscribatur.

I I I.

AD purgationem non morborum modo, sed & anni tempora diligenter observanda voluit Hyppocrates; sed cum apud diversas nationes diversi sint anni, aliis solarem, aliis lunarem adhibentibus. Cum diversum quoque fuerit mensium nomen, diversus numerus, & ordo, vel in ipsâ Græciâ. Atticis ab æstivo Solstitio, Achæis ab æqui-

noctio verno; & Macedonibus, ab autumnali principium anni repetentibus; hæc tempora non à mensibus quorum nomen, numerus, & ordo, prorsus ab hominum arbitrio pendent, & variè possunt immutari; prout in ipso etiam anno Romano contigit; sed ut longe certiore, perpetuamque (prout tunc existimabatur) regulam stabiliret, ab astorum ortu, & occasu tempestates anni, commodaque purgandi tempora definivit. Hiæ non modo Pleiadum, Arcturi, aliorumque siderum mentionem fecit, sed æquinoctiorum etiam, & solstitiorum, in quibus ad viginti dies, cavenda pharmaca voluit summus ille Medicinæ dictator; quæ tamen ubi purgandi necessitas aderit, & occasio, floccifacere debes, & contemnere. At nullum est inter sidera, cujus major celebritas, & commendatio, quàm canis: duplex autem insignitur hoc nomine constellatio: Canis enim major est, & minor; uterque dicitur Orionis venatoris fuisse, & cum ipso, Dianæ precibus in cælum evectus. Major qui australior altero, ad tropicum capricorni, à quo medius scinditur, situs est; pluribus stellis micat; quidam undeviginti numeravere; quas inter una est fixarum omnium prout apparet maxima, & splendidissima, planetæ jovi cum terræ propior est & perigæus, æqualis. Hæc in ipsius ore sita, sirius, seu exsiccatrix stella nuncupatur: tantoque fuit apud veteres in honore, ut sæpius astrum simpliciter vocaretur. Canis minor Procyon, Præcanis, & Antecanis dicitur; magis in boream vergit, inter æquinoctialem & zodiacum ad Galaxiam positus: duabus potissimum micat stellis, quibus aliæ sex adduntur; quæ præ reliquis fulget & in femore conspicitur, à nomine totius asterismi; procyon nuncupatur; à sirio distans 25 gradibus cum 42. scrupulis. Utri autem competat celebre caniculæ nomen, ambigitur. Quidam nominis ratione ducti, minori tribuunt; plures tamen caniculæ vocabulo, sirium, seu canis majoris partem fulgentissimam intelligunt, cujus exortu, unde sumitur dierum canicularium principium; fervere dicuntur maria, fluctuare in cellis vina, moveri stagna, canes in rabiem agi, terram arefieri, fruges æstu consumi, ardoresque immodicos ab omnibus animalibus, vel mediis etiam in aquis ab ipsis piscibus perferri: ideoque toto eo tempore per quinquaginta dies à purgantibus abstinendum voluit Hippocrates, propter vehementem & summum qui tunc adesse solet, aëris æstum; at convenienter quidem & suo tempori, & suæ patriæ. Ejus enim ætate canis exortus uno mense citius, quam nostro contingebat; sicque ferventissimo totius anni tempore, Ejus etiam ævo, benignioribus pharmacis, quibus posteriora nos ditavere sæcula, carebat. Suæ quoque Patriæ convenienter; debebat enim in sexto climate quod longè calidius est octavo, cujus incolæ sumus.

IV.

ORTUS & occasus astorum primo dividitur in astronomicum, de quo nunc non agendi locus, & poëticum. Hic rursus duplex est, verus scilicet, & apparens. Ille, prout oriente vel occidente sole sit, cosmicus, vel acronyctus nuncupatur. Apparens vero, sive heliacus dicitur, cum stella ex radiis Solaribus emergit, vel quæ prius conspi-

1
5
cua, iisdem occultatur; & prout ante Solis ortum, vel post ipsius occasum ea sit Sideris emersio, vel occultatio; matutinus, aut vespertinus appellatur. Intervallum autem, quo stella distare debet à Sole, ut ab ejus radiis libera, conspici possit, pro variâ stellarum magnitudine certo quidem graduum numero definitur. Nihilominus tamen pro variâ horizontis plagâ, quæ non æqualiter illuminatur à crepusculi luce, pro variâ stellæ, locique latitudine, aliisque concurrentibus causis, varium est illud intervallum; unde multum quoque varius est ortus, & occasus heliacus in diversis regionibus, eodem tempore. At cum non idem sit locus siderum, ut erat Hippocratis ætate, non iisdem quoque diebus fiunt eorum ortus & occasus. Sirius enim qui nunc in decimo cancri gradu, uno ferè signo anterior erat, ut & procyon, qui hoc anno vigesimum primum ejusdem signi cum beffe tenet. Ille qui in Hippocratis climate oriebatur cosmicè, die respondente nostri Julii sexto; nunc oritur in nostro climate augusti septimo. Oriebatur heliacè die Julii vigesimo primo; nunc oritur eodem mensis augusti die. Procyonis autem ortus cosmicus, nobis est Julii vigesimo septimo, & heliacus augusti decimo quarto, qui divino Seni, pari dierum intervallum citius adveniebant. Quamquam autem ortus iste sit tantum apparens ad eum tamen potius quam ad verum, qui prorsus invisibilis est, tempestates anni, temporumque mutationes referuntur. Qui namque primum observaverunt affectiones aëris, earumque tabulas composuerunt; exploratis Zodiaci locis in quibus ut plurimum illæ mutationes aëris accidebant, observaverunt quoque, & diligenter notaverunt quæ astra temporibus illis orirentur, & occiderent: atque eorum ortu, & casu pro signis usi sunt ad istam præcognitionem. Sic itaque illis primo significandi munus, sed postea vim efficiendi popularis consensus attribuit; cum igitur canis exortus ardentissimo contingeret anni tempore, ab illo calores æstivos admodum augeri non solum antiquis persuasum erat, sed hodie communi omnium fere sermone percipitur. Huic autem opinioni locum dedit id quod habetur in Græcorum monumentis de insula, Ceo; eam confirmavit periodus Ægyptiorum Sothica seu annus magnus canicularis, & sacrificia Romanorum canina dicta, in quibus, circa canis exortum, ejus sævitie placandæ causâ, canis immolabatur. At quamquam illa sit maximè communis, & vetustate commendata, non ideo tamen veritati magis consona, nulla namque sirio vis peculiaris, nec aliis stellis inerrantibus, ad effectus, qui ipsis tribuuntur, producidos. Velenim eam haberent ex se, vel à sole, dum sub ipsius radiis occultantur, depromptam. Ex se quidem eandem sortitæ sunt omnes stelle fixæ naturam; sicque nulla potest æstus, pluvias, aut grandines potius, quàm nives, aut frigus efficere. At si virtus quædam assignatur sirio; ceteras quoque suam habere necesse est. Sed cum earum infinita prope modum sit à terrâ distantia; ita ut hæc tota ad illarum sphaeram, centri tantum, & puncti rationem obtineat; inde à sirio, vel ab aliâ quâcunque stellâ, profluere sola, sinceraque & quin

cum vario , qui fit ab aliis sideribus influxu , variâque contagione confundatur , ad terras pervenire non potest. Unde meritò dubitare licet , an ad sirium , vel ad alias stellas , qui producuntur effectus , sint referendi. Dic præterea , si sit aliqua virtus cuidam stellæ propria ? cur ejus ortum designatus non sequatur effectus ? cur aliquando contrarius ? cur maxima sit serenitas in urbe , dum in agro proximo maxima tempestas. Neque datam à Sole vim existimes , stellæ namque longè superiores sunt ; & si credamus Theodidastō Kircheriano , centuplo magis à Sole distant , quam sol à terrâ. Sunt igitur veluti tot Soles , & ut suum non habent à sole lumen , sic nec agendi vim mutantur. At si quam haurirent à sole , id potius accideret in ortu cosinico cum ipsi conjunctæ sunt , quàm in heliaco , quem obtinere non possunt majores & splendidiore , nisi ad gradus duodecim ab isto luminis fonte & planetarum Chorago recesserint.

V.

CALORIS æstivi causa non aliò , quàm ad Solem est referenda , qui licet æstate sit à nobis remotior , prout tamen ad nostrum Zenith propius accedit , magis directos , & perpendicularibus magis similes , majorique copiâ radios in subjectas plagas emittit ; ex quibus , quando cum reflexis uniuntur , duplicatis , fit etiam æstûs , & fervoris in aëre duplicatio : concurrat etiam cum istâ præcipuâ caloris causâ diuturnior illius planetarum principis supra nostrum horizontem mora. Quantum autem difficiles sint tunc temporis purgationes , omnibus est manifestum ; cum exhausta continuâ , quæ fit æstuante cælo , dissipatione , corpora , contrarios quos inducit purgatio motus , ambientis calore succos foras evocante , & medicamento foris intus revocante , nullatenus ferre valeant. At si alio tempore , quàm sub cane & ante - cane vigeat in aëre caloris excessus , ut mense maiò vel junio ; quod sæpius , fit , non minus moleste sunt purgationes , quàm quæ præscribuntur post canis exortum : imo longè magis aliquando , cum nempe quod sæpius observatum , & etiam ab Hippocrate , tunc decidentibus pluviis , Etesii spirantibus , & adveniente frigidâ tempestate , repentina fit caloris , & æstûs remissio , atque id etiam agnoscunt calendariographi , qui dies caniculares eo toto tempore designant , quo Sol Leonis signum percurrit , habitâ potius ratione fervoris , qui tunc vehemens , & immodicus esse debet , quàm caniculæ , cujus exortus , sicque dierum cynicorum initium non accidit , nisi transacto toto illo spatio , quod suis canicularibus diebus adscribunt. Si tamen vim aliquam inesse sirio contendas , ea sane benigna debet esse , sicque non tot malorum effetrux , cum hæc stella inter eas quæ Jovis , benefici prorsus planetæ , naturam sapiunt ab Astrologis numeretur. Si vis etiam Martialem esse , dum multiplices vires statuis , nullas efficias : alterius enim effectus ab altero præpediuntur. Sed quantum istius canis cælestis salvia benigna sit , probat mellis æstivi genus , sirio explendescente genitum , quod tanquam donum cæleste commendatur. Sed cum sidera in plagas

quæ ipsi directè subjiciuntur, agant; eoque sit vis ipsorum major, quo magis in ipsas directos radios vibrare possunt: Sirius autem ultra æquatorem in australi cœli parte situm habeat, nec apud nos majorem quàm viginti quatuor graduum altitudinem obtinere possit: virtus ipsius in meridionales terræ plagas potius influet; ubi cum hiems sæviat æstivo nostro tempore, post ipsius exortum magna, vehemensque debet esse frigoris acerbitas. Si latratum adhuc, aut morsum canis cœlestis reformidas, cur non æquè times cornua tauri vel arietis, qui nobis, ut pote citra lineam æquinoctialem, situ viciniore sunt? Cur non leonis rugitum, cui pro corde splendidissima stella, tibi potius timorem incutere debet, tum propter quod leonis sit, & Reguli, vel Basilici nomen habeat: tum propter situm, quem obtinet, in ipsâ propemodum Eclipticâ, unde corpore Soli jungi potest, ipsiusque vim intendere? Cur arcum Sagittarii, horrendam Arcturi stellam, cur tot monstra, Dracones, Urso, Cetos, Scorpions, Aquilas, Corvos, Lupos, Serpentes, Hydros, Centaurum, Medusæ caput, hominibus in intensissima, non reformidas: & reformidas animal amicissimum homini? quasi ex eo quoddam cœlestis sit: alienam, nobisque adversam naturam habere debeat. Si terra tibi sordeat, & velis ad cælum omnia referre, cur non statuis ideo nobis esurialibus hisce feriis victum ex piscibus esse præscriptum, quod Sol tunc temporis piscium signum peragret. Id quidem etiam meliori jure posses asserere, quàm fervoris æstivi causam à canis exortu repetere: cum nunquam hæc accideret Ichthyophagia, quin Sol per maximam temporis ipsi destinati partem in piscibus reperiat: at canis exortus non semper æstivo tempore, sed mediâ sit aliquando futurus hieme; si tamen mundus eo usque persistat.

*Ergo non propter Canis exortum, difficiles æstate
Purgationes.*

Proponēbat Parisiis LUDOVICUS LEMERY, Parisinus,
Baccalaureus Medicus. A. R. S. H. 1698.